

程

苕溪集卷第二十四

銘 贊 偈 序

湖州德清縣慈相院新鐘銘 鑄鐘疏附

吳興德清縣僧廬曰慈相居縣治之北巖壑低昂之間號為勝利冶鐵為鐘有年數矣器小聲細不足為是邑朝昏之儆院僧用琳始欲改作而武康信士聞人譽施錢三十萬以為勸率範銅一百三十三鈞三分鈞之一求募辛苦範成而琳亡道俗愍焉越再歲長老僧道戎與其儔道殊本立懷仁行輝惜功用之中廢悼前作之孔艱合力經營散募邑眾凡用錢四

百萬始克周備匠胡姓元美其名者妙得于心知名江浙以紹興二十八年八月丁巳一冶而就隨叩響發鏗鉤雄渾溢于四境觀者疊足卷元居人咸謂宜有款識以詔來者屬同郡太簡居士劉一止為之銘銘曰 我佛如來方便微妙考鐘弗先謂失樞要惟昔祇園具存典則大士圓通多從聞入聲徹幽途咸息苦趣問胡以狀罪性空故佳哉竅工一冶而就出以机軸鏗鉤隨叩我願聞者了自聞一 聲念相發于彼朝昏六用既泯返流得源是聞與聲俱滿大千吁此器寶作鎮山色期億萬年與 宋元極

鑄鐘疏

黑業現前冥途長夜衆生自息罪性乃空惟鐘聲之遠聞發耳根之深省豈獨脫苦趣於沉淪幽暗之域抑將回淨念於醉夢顛倒之中此是藏教苦口丁寧只要檀那甘心布施共成茲事幸勿失時

德清乾元寺重脩齋厨疏

千歲寶藍枕山臨水二時清衆洗鉢同堂上方之香積不來禪悅之瓊羞難飽欲使食輪之先轉豈容庖舍之弗嚴恐有本分衲僧不曾嚼破一粒米便是古德叢席也要坐處三條椽惟大檀那與人安樂

募財重修孔侯廟疏

山翠攢叢鸞屢鳴而表瑞溪流衍迤龜左顧以懷恩  
寧惟前代之美談茲乃一方之勝事惟新進之家鼎  
盛而故侯之廟獨隳棟宇前歆日星下徹矧豐年之  
荐至豈陰祐之敢忘母事多言共興此後

飛英寺緣化脩塔疏

溪城萬室錯居洲渚之間寧堵一峯高出水雲之上  
號稱文筆又頻鎮山豈惟增氣槩之崢嶸實大係士  
民之休戚詎意百年之勝橫罹半夕之災所冀檀那  
深詳利益阿育王之願力默運胸中多宝佛之神通

悉由筆下作興此事今正是時

姜山靜疑院鐵磬老師通公真贊

堂々律師了無上乘律彼後生約束如繩我疑叩師  
師笑而嬉曰我無心法何所依以無心故說持說犯  
以無法故橫堅鈎貫我知是師說本無說身心了然  
片雲孤月姜山嵯峨宛在世外訪師遺蹤惟鐵磬在  
片雲出山孤月麗天鐵磬不鳴聲滿大千

自作真贊

枯木寒巖形影相依祿食而矐孰與遜肥四十九年  
我知其非已往不諫來者庶幾

又自贊

居閑無所樂從仕無所愧忽作此兩言自省過去事  
害性多矣晚乃安苦心至矣晚乃甘咄我無初終得  
喪考又何乘除於其間

黃草道衣贊

吳人緝黃草若麻苧貧且賤者服之聞居士始用  
作道衣并為之贊云 何草不黃誰其紡績持以售  
人得不償力居士少賤組麗是飾力貧作奢終愧于  
色居士老愚山澤放逸下澤有車登山著履被此草  
衣相羊自適倦鵠依林野麋卧石維此草黃不失土

職不以本然隨彼染習戒我居士服之無數餘年幾  
何以永厥德

任公子言其先君奉觀音大士有感供果  
不枯而長大簡居士劉某戲作此偈

無根抵而生不雨露而澤是事云何誠意感格當知  
世間明暗空色種種形相泛心地植我問公子承誰  
恩力若箇是空若箇是色公子不言一笑而答

言箴

余惟不言人或以為簡余惟多言則懼取謗而招  
譏嗚呼其危矣哉余將處夫言與不言之間曰加思

而已

動箴

輕動易舉事或失所利害在人怨汝詈汝擇焉而動  
動不失職君子是怙小人是疾則將奚處曰勿恤

勸發大菩提心廣博莊嚴供養會摠錄序  
蕭閑老人周嘉仲往在政和間兩募道俗於錢塘南  
山淨慈禪寺建發大菩提心廣博莊嚴供養勝會自  
製勸發心文及啓白疏語詞旨周盡懇到悲切意者  
以衆生背覺合塵攀緣善惡流轉生死為可哀愍於  
菩提中雖或今生見聞隨喜中又畔違如隔日瘡以

其未嘗知發大心、與境爭力強者奪中又畔違無  
足怪者故為此勝會中人下成佛作祖種子嗚呼偉  
哉時鈞臺先生諫議江公實為之記又為智炬白語  
精深奧妙閱肆演迤讀其文知其致力於斯事非一  
日矣嘉仲以前後矩範及製文與鈞臺之作合為一  
集屬余為之序余觀世間未有不由發心而能有所  
建立非特佛氏之言也所謂大心者槩而言之曰出  
世間心曰堅固心曰決定心以出世間心而行世間  
事且輔之以堅決則成敗利害死生禍福之間初  
若無物當行則行當止則止視身世如浮雲視死生

如晝夜視軒冕富貴如棄涕唾如其不然則顏子不能居陋巷而樂仲尼不能不畏匡而不憂夷齊不能重節義而死子房不能辭功名而去商山翁不能傲富貴而不來而况以出世间心而行出世间法者乎雖狀是心豈有殊哉所謂出世间抑非兩法也鈞臺先生以清節直道仕於朝論議之偉士大夫能誦之而蕭閑老人者年踰耳順官不過下大夫或不越州縣累狀坐環堵面有孺子之色而辛苦作佛事心存救物其事為可哀故余論人必察其用心而不敢以窮達為重輕余既嘆蕭閑之勤而又喜鈞臺之文為

之以增重於斯事故并叙之紹興十三年四月乙酉  
吳興劉某序

錢氏箕裘集序

右錢氏箕裘集武肅王之六世孫名悅字稷臣者之所作也武肅以兵拒巢賊討劉漢宏誅董昌盡有吳越之地尊奉上國四傳至忠懿王武肅躬蹈忠孝又以訓子孫而忠懿奉承唯謹方

太祖皇帝之下江南也忠懿提兵取常潤邑而來朝  
京師 太祖慰遣甚厚

太宗登極卒以國入覲而吳越之民幾二百年不識

兵革其陰德之茂在人膺肺間至于今未忘也士大夫喜道其事而傳聞異辭或不審諦故稷臣類其祖宗建立傳序次第與家世榮遇人才瑰傑有聞於時者若干人以為此集將附之家譜屬余序其後余嘗觀自昔門地之盛席勲舊姻戚世公世卿寵過赫矣不為不多願獨以恩澤聞而人才輩出表儀縉紳如錢氏者未見其比豈其世德所鍾與他異歟異時位孤棘秉旄鉞者余蓋識其一二即之退然如窶人子論道古今考質疑義以自樂於名教其意豈肯與恩澤侯比其有挾冊覓舉與寒士較得失率攻苦食淡

淬礪事業使余愛歎之不已也况前輩碩儒所謂一門三學士三世四賢良與其政績行義超詣卓越余之所跋慕願見而不及者哉以是知人物門地事不兩全錢氏既兼得之又何多耶如其不狀雖金張之盛七葉珥貂亦無取云稷臣在宗族中為最不過者客居異縣累狀坐空廬讀古書行古道面有藜藿之色蓋余寐莫之友也紹興十七年十一月辛卯吳興劉某序

慧和尚四會語錄序

師諱居慧吳興人俗姓吳早歲習天台教已而更服



入蘇林從甘露長靈卓公得道尋出世為人閱四名  
刹曰天聖曰靈石山崇因曰何山宣化曰道場山護  
國既示寂門人道樞集四會演暢語句成編俾信士  
刊行散施開悟後學屬余序之余嘗謂釋迦之親付  
飲光單傳心印不立文字謂之教外別傳是不容聲  
矣狀從上祖師一時言句流傳世間亦既甚多為有  
言耶為無言耶世尊良久外道得入既不在言語有  
无之間亦不離言語有无之間或因此有得焉則知  
從上祖師與師之心一也師住道場最久季後四集  
觀其為人處傾困倒屣无所蓋藏老婆心切於是為

至古德云盡大地是解脫門把手拽不入師意直欲  
出一隻手一時拽入耶余恐得入者并門失之是乃  
師之意也欵紹興二十七年二月十日太簡老人劉  
某序

茗溪集卷第二十四

茗溪集卷第二十五

疏語

祈晴疏語

瀕海之郊水之滯積雨暘涉旬反覆旱溢乃春甲子  
連雨不止民之望秋曰于茲始春澤既多其後則愆  
消息卷舒理有必然惟神相民憐此過計無使僭差  
以訖嘉惠

環湖作郡繚郭為田當三農舉趾之時抱百日連陰  
之雨顧斯民為可哀愍惟大士是真依歸爰啓淨筵  
仰延瑞像廓山川之氛翳還日月之清明庶幾佛慈

不違民願

自冬徂春徃雪以雨寔淋漓而未已惟墊澇之是虞  
安能致力於人為唯有投誠于天造願收陰慘覆以  
春溫民將有事于農吏亦獲迓其責庶殫薄効仰報  
鴻恩

運在木饑既爽一年之蓄候當陰肅更經三日之霖  
耕夫共苦于沾寒穡事尚幾于薄少願廓山川之翳  
俾終場圃之功

兩三日曰霖過則非福雪盈尺作瑞甚者為灾婦子  
有號寒之聲衣褐無率歲之具惟民可憫願帝霽威

秋稼方穗我田既臧茲惟上帝之降康寧使成功之  
或爽風雲驅掃願即霽於陰威種稔後先俾悉臻於  
堅好

積潦十旬方拜時暘之賜疏苗千隴又懷垂槁之憂  
雖屢噴以知慙念歸誠之有素慈雲廣覆願舒不盡  
之陰法雨滂流更借無邊之潤

謝晴

雨淫不止民懷墊澇之憂農事小愆吏受怨咨之責  
忱辭潛達嘉應已彰仰惟神靈近若影響念天地之  
大施雖曰難名効螻蟻之小勤庶云知報

常寒為沴積潦是虞祇歎淨筵用伸微悃隨緣赴感  
若影響之於形聲反雨為暘蓋威神之所變化吏敢  
忘報民實知歸尚期無礙之慈終此有年之賜  
暑雨祈寒念群情之多怨金穰水毀諒歲事之可回  
職在近民責則歸已方冀忱辭之上達敢圖哲鑒之  
下臨莫報洪慈誓堅精意

曩者積陰于茲再瀆惟大士具慈悲力度衆生以方  
便門僅同指顧之間忽若形聲之感莫伸微報徒激  
懦衷

淫雨不止穡事稍愆念小民寒暑之怨咨寔司其責

惟大士神靈所變化何有甚難甫露微誠遽蒙嘉應  
仰戴生成之德敢忘報事之私

迺者有淫潦之憂祇告群祀神用頌答如響惟神惠  
民吏則知德其何敢不拜

### 祈雨

故歲不登新田未墾曾無寸澤坐閱上春仰天地之  
垂慈有風雲之赴感國無六年之蓄曰急矧今民之  
方飢雨自三日以往為霖願濟時而僅乏  
郡號瀕海壤地寔腴而陂澤無儲蓄之利雨暘過差  
民悉以告于吏、特牲酒禱群祀不則縮手無他力

也今境內不雨僅閱兩旬河流日損舟楫告病農懷  
隱憂吏已莫知所出惟神食此民久矣曲折之狀宜  
知之詳其終惠之敢固以請

謝雨

以心為心不奪衆生之志願曰雨而雨了知大士之  
威神民用交欣吏慙莫報尚冀覺慈之無礙終令歲  
事之有成

曩者有旱暵之憂祇告于神應期而雨越二日復霽  
如初懼吏不知謝不克終受神貺嗚呼田壠折矣禾  
不得滋以穗也井洩渴矣民不得酌以溉也神其忍

聞之乎敢涓辰往拜以謝以請

祈雪

郡境自秋閱冬甘澤甚愆河流告涸麥田龜折民懼  
疫癘歲行盡矣雪當應期是用祇見群祀嗚呼匪惟  
民實依神、亦惟民之依其庶幾發盈尺之祥沛優  
渥之德也惟吏與民敢不知謝  
十旬旱魃方疫癘之是虞一夕同雲識豐穰之有兆  
惟此及民之實何殊雨粟之功益知大士之普慈曲  
赴衆生之微感已拜先春之賜尚須盈尺之期

謝雪

海邦千里念甘澤之久愆 帝闕九關冀飛章之上  
達仰瀆蓋高之聽自忘不測之誅豈意洪慈俯垂嘉  
應同雲驟合已沾濡槁之恩尺瑞可期願卒有年之  
慶

茗溪集卷第二十五

茗溪集卷第二十六

祝文

疏語

春祭諸廟祝文

季春謹時春物既陽日直大火戴勝降桑農夫力田  
婦服懿筐神既以時適茲雨暘守土為民敢替厥常  
予以告虔牲肥酒香

秋祭諸廟祝文

惟時仲秋百物順成秀且實稼實穡一黍稷茲一將  
獲積雨賜小愆民則怨咨吏當責及其成功吏亦何  
有繫神德春秋祈報著于禮典守土職神其鑒茲終

惠我民毋爽忒自今以往醜酒魚羔燕此佚豈惟我  
民神亦庶幾有飲食

冬祀赦祭諸廟祝文

展采崇壇秉圭奠璧風雲奔走各以其職皇帝曰嘻  
惟時幽明交相厥事同我慶成昭天漏泉沛澤均被  
肆命有邦稱秩群祝天子萬年宣室受釐亦惟尔神  
永有依歸

赦祭諸廟文

皇帝以正陽之月復正大位肆赦多方稱秩群祀我  
守土臣用祇祓以告嗚呼天惟祚宋若周邦卜世卜

年以永無斁惟神各率迺職用奠方隅弭難消兵毋  
有不庭為君民憂則神永有主民有報事尚勉哉

皇帝登極赦祭諸廟文

皇帝摠師靖難勤勞王家功大德備念歷數之有在  
審謳歌之歸已迺以五月朔旦登受大宝天地交感  
日月揚光赦令既頒澤及幽顯遠近臣吏下逮黎元  
扶老携幼手足縮舞或至感泣願少湏臾無死以觀  
中興豈惟臣民神亦永有依歸各率迺職用勵相戒  
國家其無怠

車駕巡幸祭山川文

皇帝南巡諸侯寵綏吳越寬政毀閼薄歛已責德意甚厚於是命有司走群望謹故事也惟山川之靈各率迺職用先後奔走勳相我王家安安爾封疆則尔神心有光寵

誕皇子赦祭諸廟文

皇帝昭承丕緒卜年以永九廟儲休是生元嗣配天其澤敷錫萬方肆命守臣稱秩群祀用祗祓以告

越州脩城祭廟文

郡介居江湖之間環水為城山潦暴集衝墊坳剝閱日滋久襟袍虧竦無所蔽障某承之帥事甫見吏民

問所先務則曰無誠何以保民慮事量功所不敢後凡板榦畚築之具土物遠近之程分授有司消日勩始惟神其相茲後使工不病勞期不愆素以迄有成惟神之休敢不知謝

重修告成觀奉安聖像祝香文

伏以會稽鎮山陽明洞府昔開遽館上奉高真既圮剝而弗圖懼欽崇之靡稱是用新絳闕通明之殿嚴紫清睟穆之容爰擇吉辰具陳鈔供臣有愚悃仰冀降衷兩宮蒙塵念絕幕之既久嗣聖即改曾奠枕之未遑外虞猶夏之遠夷內有弄兵之群寇非穹蒼之



悔禍豈人力之能謀伏願眷我家邦錫時祉福回鑒  
並駕見二聖之重歡弭難消兵衍一人之有慶

代太守謁廟文

某服天子命以育民社維日乙巳臨視叩章越三日  
丁未用祇見于群祀惟是愚暗拙疎無補事功以為  
大懼仰惟先聖先師實寵靈之俾安厥職某亦不敢  
忘所學

祭勾芒文

故事立春出土牛耕以示耕之早晚惟帝布令神實  
相之尚左右民俾為善歲

灘祭文 太陰神

刺史御天子命有民社將壽民無妖凶惟時季冬日  
歷虛危陽鬱未伸強陰負時百鬼憑依幸時不虞蹂  
戾險肆跳跟上下噓氣為疹使人寒燠求食嘔泄不  
知愧恥刺史不得不為民憂是用考稽禮典索室驅  
役傍磔于四門之外擊戈揚楯迫逐以出屏之遐陬  
惟神卒相此民其毋惠姦刺史將究聖天子涵養吹  
噓與物為春之德

天寧節祝 上皇回鑾疏語

朔漠飛沙遠想鳴銮之節首冬在候俯臨誕聖之朝

惟是舊臣敢忘善頌

太上道君皇帝伏願明神薦祉鄰敵革心佇龍旂早  
晚之還副蘭殿晨昏之慕

胡地風霜念屬車之遠狩漢家歷數當 嗣聖之中  
興緬懷孝養之勤爰罄誕弥之禱

道君皇帝伏願壽隆冥翼福固山河慶萬里之遄歸  
儼百靈之森衛

歲星屢易尚勤絕域之游誕節俯臨益動故臣之感  
惟時中外咸罄禱祈

道君皇帝伏願壽與天齊福侔川至儼百靈之警衛

慶萬里之遄歸

徽宗皇帝

顯肅皇后大祥就法慧寺修

水陸道場并齋僧疏語

仙遊已邈永違率土之瞻依祥祭甫臨難抑舊臣之  
悲慕有嚴法會祇誦秘文用自竭於丹誠庶少資於  
冥祐

徽宗皇帝顯肅皇后伏願圓成妙果超證上乘至彼  
帝鄉居先王之左右永茲世祚燕後嗣之子孫

天申節祝 聖疏語

九廟儲休三靈錫羨萬生上聖用啓中興占誕弥厥

月之祥釐於萬斯年之祝

皇帝陛下伏願乾坤共久真翼比隆上恬下嬉燕周  
家之禮樂東漸西被奠禹貢之山川

宗廟儲休克相續承之始人神交慶屬當震夙之辰  
爰假妙因仰伸善頌

皇帝陛下伏願丕承帝眷誕保皇圖率土底寧歸詠  
歌於四裔後天維老卜厯數於萬年

天昨朱德將底于中興福孕宗祊篤生于上聖采天  
保六章之義罄華封三祝之勤

皇帝陛下伏願等固山河比隆真翼乃文乃武益光

並受之丕基得壽得名克績無疆之大厯

茗溪集卷第二十六

茗溪集卷第二十七

請疏

題跋

請承天文長老疏

道人分上隨處縱橫佛事門中臨時顯設而况開千  
 年之祖席新一日之叢林須是作家承當此事長老  
 文公天童嫡嗣黃龍諸孫久為道俗之宗師端是人  
 天之眼目機鋒電掣棒喝風生惟承天道場蓋會稽  
 名利百文之規繩久廢滄山之警策無聞近自琳宮  
 復歸蘭若尺天寸地共知道化同流萬壑千巖請向  
 要津坐斷當仁勿避正令須行

請天章長老再入疏

在、處、皆是道場刹、塵、無非佛土而况風烟  
絕景巖壑故棲脩竹茂林有東晉群賢之勝踐琅函  
鈿軸歲西清列聖之寶章惟此任持不同眇小長老  
某人機鋒獨出福慧雙行雲門宗支密傳心印蘭亭  
世襲自立家風此時無異彼時已任不妨再住直須  
化出善財彈指之閣再安維摩方丈之居是為未後  
神通為作當來利益僉言所屬仁者可辭

請天寧覺長老疏

越絕城中宮如化出翠堵波下峯是飛來鐘鼓四聞

煙雲環拱堪作人天眼目方可任持正當時節因緣  
不容放過長老覺公宗門先覺古佛後身示不二於  
默然擲大千於方外全潮不露孤月現前雖云自己  
家風要是為人邊事臨時顯設在處神通無舉足下  
足之殊何彼方此方之擇再試金剛寶劍拈出古廟  
香爐尺地寸天同歸指掌千巖萬壑此是要津已屬  
當仁不妨坐斷

請天台教院開闍梨疏

一心三觀蓋逆空假中求萬論千經不離言說邊事  
兼融此義須假通人闍梨開公威德嚴身清真拔俗

遊戲三昧以筆力為神通和會兩家用儒書作佛事  
惟天台淨刹據越絕要津自利、他正要塵中之隱  
無說、法始名教外之傳僉曰當仁毋勞固避

請圓通教院如閣梨疏

領畧真機覺悟止由一宿縱橫妙旨談說至于九旬  
有覺非真多談亦妙欲了此間勝義直須本分導師  
閣梨如公道學邃深辨才通敏支道之善標宗會雅  
蒙謝傳之知道安之略編群書宜得習公之譽矧圖  
通之古刹號靈感之道場人于大士有緣食是諸天  
打供苟非宿望難服衆心舉步而識象王茲焉取法

探穴而得虎子誰敢爭行為教僧舊呼師要恢東越之  
宗風無愧靈山之聽衆

請天長知觀蕭法師疏

鑑湖一曲琳館百楹草木葱籠煙霞清潤賦詩載酒  
跋翰林外監之蹤騎氣御風有安期羨門之侶惟是  
勝士乃堪此居知官法師挺拔俗之孤標東棲真之  
素志丹經石辭曾遇異人金母木公為傳真誥主張  
道紀領袖羽流庶幾惠然肯來為成此段奇事

請龍瑞知宮棲法師疏

會稽鎮山陽明洞府齋宮宏啟羽帔四臻必得名流

為扶道紀知宮法師神棲物表心拜帝闕讀三洞之  
秘言受七真之妙訣飛符嘆酒未忘救物之誠採木  
茹芝便作住山之計僉言所屬仁者可辭

龍瑞宮開堂疏

太上妙道躋合自然三洞靈文言無韻麗欲開此祕  
必得其人知宮法師慕真穎之高風有孫許之勝韻  
巖棲穴處不妨風馭之後游心拜默朝自覺帝闕之  
咫尺來從東秀坐鎮陽明傾耳藥書洗心萍衆祝  
君王之萬壽贊寶祚之中興

題褚氏印施金光明經後

會稽褚邦直印施大乘金光明經薦嚴二親用報罔  
極屬余題其後每得書問無恙外未嘗不以為言余  
謂孝子之于親無所不用其至以為親之德不可報  
者終于不報而已若曰必報在一念頃蓋已周編十  
方於光明會上菩薩諸佛如一、親至其前承事供  
養無空過者而况此經一句一偈一字一義了然在  
目其為莊嚴心豈有量乎哉余之言無能加損也紹  
興三年十二月戊申吳興劉某題

跋李尚書贈政上人三詩

政上人携尚書隴西公送行三詩見示將刻之石俾

余跋其後隴西公胷中如水鑑所見又物不能以情  
遁師既經題品矣黃龍三闕不足透也紹興五年三  
月日吳興劉某題

題章致平丐父內徙表後

故禮部章公刺血上疏乞父內徙懇到深切辭氣兩  
盡既上半歲而得請家人子弟鮮有知其事者後四  
十年而公之真蹟乃存于一時故相之家公之次子  
今上饒使君實得之嗚呼豈偶然也哉豈偶然也哉  
使君不鄙見謂且使跋卷軸後某伏讀數過且喜且  
悲之悲公誠孝之實久湮而未耀喜公之有子能致

之於流落艱難之中俾公行義略見于此書而世襲  
之美抑他日又有大焉者也紹興十四年六月某日  
吳興劉某記

跋司業許公墓帖後

司業許公在太學時某為諸生實相先後因獲從師  
德游公行義文學一時宗師非但鄉里後進如某者  
知敬慕而已逮今踰五十年前輩軌迹既不可追師  
德又下世而得此卷軸於師德之令子展讀感歎謹  
識具

跋孫求仁運屬夢記石刻後



求仁三歲而孤又二歲喪所恃寄養外家世間可悲  
愍事無越於此當是時人其謂我能自奮身大其家  
風種學績文為多縉紳光賁泉壤如今日之懿乎成  
否有命雖求仁心不敢自必抑其先德有以相符見  
於夢寐殆誠孝所感發云紹興二十九年六月辛丑  
吳興劉某書

跋南宮唱和詩後

太僕公最先得詩名後來宗英皆莫及計與東坡先  
生同官時距今七十年中間某居太學不敢以姓名  
累典謁晚乃得此卷軸於公之曾孫師醇某年已八

十矣追前輩事三歎而歸之紹興丁丑八月上澣吳  
興劉某記


跋莫用之書藏經

同郡莫用之未老而請老好閑而得閑子甚喜之久不得面  
一日持所書釋氏藏典曰賢積華嚴涅槃經及大智  
度論等累四百五十餘卷通為四十八函見示以薦  
其親又於報本禪院創脩輪藏以貯此經累歲而後  
辦嗚呼心良苦矣予真為之喜三歎而歸之曰用之  
於今志願已畢真得閑矣真得老矣紹興二十九年  
七月丙戌劉某行簡書

題費校書被召書命軸後

毗陵費懿恭校書之子錯為歸安丞一日過余出其  
先君同陳去非大叅張彥實舍人名對書命於今三  
十年三君子皆一時名士之畏服者也其後陳張  
二公位通顯懿恭僅居三館已而歸隱錫山再召不  
起蓋其志也世人以進退議得失余以謂士各有志  
亦有命焉苟遂其志均為得也何失之有獨喜懿恭  
有子能世其家若相乘除云紹興三十年正月庚子  
吳興劉某行簡書

苕溪集卷第二十七



卷之二